

Awe ta recordá 32 año cu Juan Enrique Irausquin a fayecé

ORANJESTAD - Awe ta net 32 año pasá cu Juan Enrique Irausquin, conocido ciudadano político y estadista Arubano di PPA a fayecé.

Un persona durante su vida hopi activo riba diferente tereno, di cual Partido PPA ta publicá su biografía.

Juan Enrique Irausquin q.e.p.d. a nace na Aruba dia tres di December 1904. Despues di a terminá su estudionan di Lagere School na Aruba, el a bai Corsow unda durante varios año a sigui diferente curso den accounting, money y banking através di un instituto Americano.

Tempo cu e ta tin 14 año,

el a drenta servicio di Hollandse Bank como office-boy y den un tempo relativamente cortico el a yega ta na procuratiehouder.

Impulsá pa un ambicion di superacion Juan Enrique Irausquin na 1929 a tuma retiro for di Hollandse Bank y drenta servicio di e firma John G. Eman cu durante algun tempo tabata haci negoshinan bancario. El a bira fundador di John G. Eman Bank y na año 1936 e firma John G. Eman den cooperacion cu Maduro & Curiels Bank NV a dicidí di funda e promé banco na Aruba.

Aruba Bank N.V. Juancho manera popularmente señor Irausquin tabata conocí a bira director di e banco aki, pues-

to cu el a keda ocupá te na 1951, ora cu el a laga e puesto aki pa dedicá su mes na política.

E tabata tambe presidente di Cámara di Comercio, di e comision di turismo, miembro di hopi comision económico, co-fundador di Rotary Club y Home Building Foundation na Aruba, actualmente yamá Volkscrediet Bank.

Na año 1947 el a bira miembro di Staten y despues di esaki el a ser reeligí como tal den tur eleccion cu a tuma lugá. Varios biaha el a ser nombrá Presidente di Staten como reconocimiento pa su capacidatnan parlamentario.

Desde 1948 el a participá na tur conferencia importante en coneccion cu autonomia

pa Antiyas y reconstruccion di Reino Hulandes. E tabata forma parti di e Ronde Tafel Conferentie y e asina yamá Kleine Commissie.

MIEMBRO DI STATEN

Na año 1947 Juan Enrique Irausquin a funda Partido Patriotico Arubano (P.P.A.) y dos año despues el a gana dos asiento den eleccion pa Staten.

Na 1951, tempo cu e promé eleccion di Eilandsraad a ser tení, el a ser eligí, keddando miembro di e organismo aki durante varios año y desplegando un oposicion, cu hama a ser igualá den historia di Aruba.

Resultado di esaki tabata 15 asiento den Eilandsraad di Aruba.

Dia promé di April 1956 el a ingresá den conseho di minister como Ministro di Finanzas y Fomento, puesto importante cu el a keda ocupá te na su morto riba 20 di Juni 1962 na Hospital St. Elizabeth na Corsow pa 7:30 di anochi.

Por mencioná tambe cu e planta di awa y electricidad, WEB, tabata un empeño di Juan Enrique Irausquin pa e ser expandé. Dor di awa y electricidad cu e planta por a ofrecé, tabata posibel pa atraé na Aruba e planta químico, Antiyas Chemical Company y desarroyá e hotelnan.

E carretera banda di Aruba su playanan cu actualmente ta hiba su nomber, a goza di su atencion incansabel. Y no ta lubidá e planificacion di un hospital moderno, etc.

Promotor di un era nobo di e industria di turismo, bao di su insistencia hotelnan a ser trahá pa e beachnan p'asina iniciá un segundo pilar di economía pa e isla. Tur esaki den un tempo cu masha hopi habitante tabatin duda si esaki, esta turismo tabata un alternativa pa Aruba.

Juancho Irausquin a keda para'riba cu Aruba tabatin mester di un segundo pilar económico pa por salba economía Arubano si un dia e industria di LAGO mester sera su portanan.

Na año 1984/85 e periodo cu Juancho Irausquin q.e.p.d. a visualizá a yega y ora Lago a sera su portanan ta hustamente e industria di turismo di Juancho a salba isla Aruba comprobando su vision.

Juancho Irausquin tabata casá cu Maria Pinkus y su nomber, labor, actitud, caracter y sentimento pa problemanan di e ser humano den comunidad y mucho mas a hibé den tur skina di Aruba.

E tabata un homber recto, di caracter serio, cu awe te ainda ta difícil pa haña otro pilar mescos.

Ta pesey riba su estatua tin e palabranan "Sirbidor di Pueblo". □